

摘藻堂四庫全書薈要

集部

欽定四庫全書薈要

集部

大復集卷二十八

六至

詳校官候補通政司經歷臣郭祚熾



欽定四庫全書薈要卷一萬六千九百八十三

集部

大復集卷二十六

明 何景明 撰

言律詩六十三首

別王秉衡御史

客車梁地相逢日
驄馬秦關獨去時
荏苒風塵千里別
飄零江海六年思
旌旗暮入黃河戍
殿閣晴登華嶽祠
攬轡未應違壯志
揮毫先已見雄詞

元夜仲脩宅對月

春月同看此度圓酒杯聊得慰愁顏
宮前火樹晴相照苑外金珂晚並還
南去漢兵連楚蜀北來代馬傍關山
侍臣尚憶先皇宴慚近清光霄漢間

省中贈勤甫

春城紫禁轉逶迤退食相尋出省遲
晝漏遙從宮閣報晴雲先傍苑牆移
行吟才子陽春賦坐映仙郎白雪姿
少日從遊並英俊十年潦倒愧君知

遊郭氏園

郭侯園林清客心
况有樓閣炎天陰
亭亭高雲石五色
颯颯白日松千尋
已辨清尊為樂事
不須出郭開塵襟
鄭谷秦樓豈異此
市朝巖壑空長吟

送杜司訓之藍田

少陵詩卷名山水
王氏丹青老歲華
勝地常令一帳望
儒冠今喜慰生涯
青羶不愧商巖草
白髮何愁杜曲花
秦嶺終南得見否
宦遊吾已倦塵沙

送張子之浙江

張子別我吟玉壺荷花五月下江湖南探禹穴行逾遠
東望滄溟興不孤司馬少年遊萬里左思當日賦三都
平生壯觀今塵土回首高歌愧爾徒

寄杭東鄉高曾唯二憲副

舊遊俱是吳中俊相憶遙為越下吟他日雲霄須比翼
此時金石更同心樓船水戰江流急鼓角秋城海日陰
寇賊兩鄉今阻絕北雲南樹各沾襟

一作各天風
雨一沾襟

簡施聘之

欲扳御史新驄馬擬脫仙郎舊錦袍
五色文章真鳳鳥百年功利一鴻毛
當壚不愛燕姬少倚瑟番驚越調高
二十年來空落魄風流今已愧人豪

壽西涯相公

黃閣文章鳴大雅玉機功業贊維新
十年天下先憂淚五畝園中獨樂身
南極壽星朝北斗靈芝仙草映長春
裴公郭相看前代社稷蒼生望老臣

小齋初開崔郭田三君子至

本買堂齋為客居敢扳冠蓋枉吾廬清風坐引高人榻
深夜門停長者車竹下涼蟾輝几杖花間螢火靜琴書
黃門翰苑俱隣近濁酒盤飧意不踈

送雷長史

彤管先朝隨帝子白頭今日奉王孫漢庭亦羨相如美
楚客重看賈傅尊花下圖書開玉殿目高琴瑟在朱門
十年亭閣淮西宴腸斷梁王雪夜樽

寄黔國公

萬里山川開百粵十年戎馬暗三巴
伏波銅柱衝炎塞橫海樓船出瘴沙
鴻鴈不傳天北字瓊瑤空憶日南華
飄飄奉使金門客目斷銀河八月槎

送趙元澤之嵩明州

日莫千花出漢園秋深萬水入湘沅
干戈喜見黃塵息勲業愁看白髮繁
西域瑤琨常北貢南天星斗似中原
一官萬里何嗟嘆倚劍長歌行路言

七夕

楚客旅魂驚巧夕燕京風俗鬪穿針樓臺送暑催秋扇
關塞迎寒起暮砧海內弟兄風雨夢天涯兒女歲時心
乘槎莫問支機石河漢年年此夜陰

雨夕集世其館

秋風浙浙吹人衣鳴雨瀟瀟晚細微萬里賓朋留不數
十年江海願常違高城木葉聞先下客舍流螢見已稀
為報春來一作求鴻鴈侶塞門霜雪好南歸

八日勤甫惠菊

燕京明日是九日庭下菊花無一花豈意高人分玉樹
遂令僻地有瑤華當軒獨酌憐秋石倚檻叢開映晚沙
便語南隣田給事不妨就飲過西家

宗哲初至夜集

衛川舟楫九秋旋京洛衣冠更此筵萬里況逢鴻鴈候
一杯仍對菊花天燈前月落城烏起堂上雲開塔樹懸
聚散古今同逆旅莫看風景倍悽然

九日送師御史之浙中

燕臺九日送行旌欲行不行驄馬鳴祖席正逢黃菊興
親聞先動白雲情霜飄斧鉞江邊駐日出樓船海上行
磊落此身真報主豈徒壯觀說平生

和張子純白髮

我見秋風驚壯心君悲白髮苦相侵愁多不道潘年少
吟苦誰知越思深客裡歲時供覽鏡天邊霜雪助沾襟
平生浪說如雲盛蓬鬢稀疏踈底似今

送張國賓進萬壽表還

名王表達維藩禮賓使恩勤奉教時鳳管暫停秦女曲
龍旂遙覩漢官儀秋楓旅夢迴青瑣春草鄉情動玉池
歸到定知承睿問雪園梅殿有佳期

送張元德侍御巡畿內

漢京樓殿鬱雲虹淮海文章御史驄三輔自來多寇盜
五陵今日更豪雄埋輪亦在都亭下攬轡仍行甸服中
滹水太行煙霧裡獨看高隼擊霜空

夜集劉德徵

冬夜深杯醉減愁北堂寒色坐幽幽
長安第宅頻相過海內冠裳此並遊
竹靜風燈懸近牖天清霜月起明樓
燕南楚北誰非客旅鴈賓鴻各自求

慈仁寺送良伯

入寺松陰散鶴羣出城冬旭裊烟氛
叢篁僻地猶風葉獨鴈荒臺倍朔雲
不奈旅魂江北斷更看仙侶日邊分
燕山樓閣晴無數朝暮鐘聲送客聞

劉德徵上陵還有贈

仙郎昨自五陵歸
駿馬朝回獨掩扉
已向西山瞻帝寢
更從北極眺王畿
霜鐘澗壑流清漢
玉殿松杉眇翠微
先帝侍臣零落盡
泰園一作園花宮草日霏霏

登勤甫樓

天半登樓冬日微
帝京臨眺轉依依
河水海雪春聲動
苑柳宮梅歲色歸
豈意雲霄今下榻
祇緣鄉土更沾衣
風塵此地愁回首
蒿洛他年願不違

月夜王宗哲宅贈田勤甫江西提學

高城吹角此宵寒
遠客今歌行路難
歲暮風烟殊去住
天涯燈火共悲歡
西江日落移舟入
南斗星懸倚劍看
廬岳玉山千萬里
不知何地望長安

送劉養和侍御謫金壇

丹陽北郭是金壇
此去無歌行路難
當道豺狼曾避馬
得時鸛隼却驚鸞
風霜華杪留顏色
鐵石人間識肺肝
漢北陝南今涕淚
不知遷逐向江干

送王秉衡謫贛榆

嗟君萬里復南遷，此別江湖倍黯然。
日落塵沙行海上，春生霜雪到天邊。
中流得瓠常相保，九折回車且自全。
世路風蓬各飄轉，不知攜手是何年。

送許庭美之浙江

浙上烟塵接楚臯，干戈休嘆此行勞。
吳花越草新詞賦，海岫江峰壯節旄。
誰惜鳳凰先折翼，獨教神駿久悲號。
尚書風義今如在，况覩君才奕世豪。

送韓師之邵陽

千金市馬幾登臺老駿誰憐萬里才豈有明珠終暗擲
只看桃李向陽開劍門日落兵西阻河華春生鴈北來
父子通家真骨肉不堪岐路重悲哀

送殷近夫之青田

石川居士昔食霞為吏風塵不怨嗟海上故栽彭澤柳
江邊新種洛陽花飄飄暮送凌空鷁渺渺春迴上漢槎
安得便同仙令去遠從勾漏覓丹砂

奉寄泉山先生

北戰南征兵未休我師高卧只林丘
蒼生尚繫裴公望白髮寧忘范老憂
江上弋人徒慕鴈海邊漁父不驚鷗
冥冥蘿月三山外獨倚京華萬里樓

晚過君采次韻

朔雲卧對寒城菊燕月留沾晚市醪
向客靡蕪南國遠背人鴻鴈北風高
杜陵愁極惟雙淚潘岳情多已二毛
同病相憐不同去莫將江海問西曹

得獻吉江西書

近得潯陽江上書，遙思李白更愁予。
天邊魑魅窺人過，日暮鼃黿傍客居。
鼓柁襄江應未得，買田陽羨定何如。
他年淮水能相訪，桐柏山中共結廬。

夜訪黃明甫

相憶江湖夢寐前，相逢京洛更悽然。
白頭重感同盟意，春雪猶傳寡和篇。
醉裏菊花開晚暮，坐深金鼓動霜天。
十年岐路無窮事，話到秋堂夜不眠。

雨過徐舍人

長安六月半雲雨孺子軒牕清香然炎暑未能侵此地
虛無只擬對江天花邊冉冉輕雷映竹裏微微夕景懸
訪舊一尊那惜醉衝泥匹馬更須憐

雨後汝立見過承詩贈

渺渺城波淨客堂朝回高詠接仙郎炎天忽送風雷氣
僻地惟聞草木香欲借沙堤添水檻祇疑車馬駐江鄉
一杯暫許留今雨隻字真看比夜光

十六夜劉子宅對月次韻

芙蓉清月鳳凰城
露白秋堂碧霧輕
一歲未令今夜減
百年能得幾宵晴
雲間鸞鶴霓裳曲
海上神仙赤石英
楚奏燕歌俱感激
塞垣江國重含情

夜過君采

天邊歸客滯寒城
下馬殘尊萬里情
冬館明燈猶艷菊
水鄉春棹杳啼鶯
風塵歲暮愁相送
險路人間恨獨行
莫把悲歌助哀柝
北堂今夕淚沾纓

無題回文

絃中曲怨不同調
早見相如病骨銷
眠獨夜烏啼渺渺
夢多春草碧迢迢
烟生暗閣鸞沉鏡
月落空樓鳳罷簫
年往恨花飄水逝
傳書有鴈一停梳

送海岳陳翁還常州

海岳先生眉髮青
北遊歸興渺滄溟
雲霄萬里看辰極
河漢孤槎送客星
裊裊菊花南國宴
萋萋蕙草北山亭
水雲曲奏流金石
風雨蛟龍夜夜聽

送良伯

去年秋杪遙相送，今歲冬殘復此行。
寸草獨牽千里思，一枝同有上林情。
江楓野泊停霜夜，海月官船動水程。
何處逢人問消息，梅花南國望春生。

以道席上送世具與其妹丈蕭執夫同行

燕山杯酒暫相隨，楚岸扁舟遠並移。
鄉土青春歸有伴，風塵滄海見無期。
舊遊每憶三江興，此去遙傳五岳詩。
弟妹憐予各飄轉，天涯送汝不勝悲。

兩湖書屋

書屋何年結構成
青天對落兩湖清
岸迴沙檻鼃鼃圻
水抱晴牕日月生
開卷已知當世事
下帷應見古人情
扁舟南國無由並
暮采芙蓉悵獨行

送韓大之赴新都

漢庭仙令幾時回
蜀道風烟此日開
萬里一琴將鶴去
九霄雙舄望鳬來
雲邊石棧斜懸閣
樹裏春流曲抱臺
藏器久知盤錯志
脫囊今見古人才

送劉朝信之江山

江山縣中山木蒼颯颯風林開豫章嶺石細通閩鳥道
澗流斜帶楚人鄉青天岸幘時行郭白日彈琴不下堂
同學共知年少志豈將書劍負行藏

簡汝立

汝病幾時辭省署我懷終日念鄉關風塵對酒空行路
雨雪逢春尚在山少室三花無客采小山叢桂有人攀
淮南洛北如相訪一鶴雲中往復還

蘇考功宅宴集

九衢春月罷歌鐘
萬井晴烟翠欲重
吏部文章今再見
漢京冠蓋日相逢
流鶯漸歷宮中柳
鳴鶴先傳寺裏松
細酌清吟聊此席
北山南郭是吾蹤

答盧侍御樊氏洞中觀梅見懷之作次韻

主家花憶繡衣人
仙洞詩看玉樹親
未暇霜威同索笑
却因麗藻獨傷春
秦簫暗度樓中月
洛襪微生水上塵
白雪西臺真有調
碧江東閣恨無津

送賈學士之南都

金陵樓閣九天開，銀漢仙槎萬里來。
宮月夜懸鳩鵲觀，江流春轉鳳凰臺。
直從北極看南極，却望中台接上台。
鳴世早傳吳下作，逢時真一作更羨洛陽才。

和李宗易內翰立春日作

春日長安車馬迎，密烟輕旭弄朝晴。
詩來草動池塘色，吟罷花增館閣情。
萬里江湖桃竹杖，十年風雨鐵燈檠。
一官擣散空時序，又見春盤細菜生。

送施聘之侍御

海甸春風攬轡情
燕關驄馬去還鳴
繡衣霄漢花間出
錦纜江湖樹裏行
近日西臺多諫草
少年南國有詩名
別絃更憶風流調
愁聽東城二月鶯

送劉令還襄陵

聞道襄陵有勝遊
西行風景似南州
竹蟠縣裏青青出
水到城中曲曲流
仙客候鳬知下舄
吏人迎鷁見回舟
亦知枳棘棲鸞地
露冕重來只暫留

送都南濠歸吳

愁論白首為郎日喜見青山送老年去望雲霄皆動色
到知鄉里更稱賢丹梯五岳盧敖杖春水三江范蠡船
他日著書應不少可無人識子雲玄

輓陳翁

復清堂上罷鳴琴彭澤門前柳自陰萬里聲名傳翰墨
百年圖畫想山林江邊鴻鴈冥冥逝海曲蛟龍夜夜吟
五色近看雙鳳羽赤霄應慰九原心

三忠祠

三忠祠在帝城東檜柏陰陰沙院風朝暮冠裳頻下馬
春秋香火一開宮中原涕淚江山遠異代精靈廟宇同
漢業崩摧如宋業古今南北恨無窮

送杭憲副兵備天津

天津橋北望京樓金鼓東行節使舟日月晝懸滄海樹
龍蛇春歷九河流百年貢篚通南極萬里旌旄屬上游
莫笑談兵尊俎上書生元不為封侯

謁李文達公祠堂

故相勲名未渺茫先朝賜第轉輝光
青松雷雨餘枝幹古屋塵埃自棟梁
魚水已無千載遇斗山安有一時忘
雲孫更是通家誼常拜冠裳到此堂

衍慶堂為無錫錢世喬作

華堂結構琴書敞吳越衣冠族姓繁
遠向西山占氣勢深從江水問泉源
新巢燕雀生成去古木蛟龍屈曲蟠
他日長卿乘駟馬始知于氏有高門

寄世恩愛日樓

東曹昔賦望雲行南國今傳愛日名
九折豈忘回馭志百年真慰倚門情
江鄉春水鱖魚至海岸冬雷竹笋生
珍重樓中調膳者此身何止萬金輕

送闕郡博

郡學宮牆入翠微廣文今去有光輝
久知白首甘貧病且坐青氊息是非
石磬古堂時自發風雩春服暮同歸
城中來往多冠蓋名教無言樂地稀

送吳司訓之內丘

內丘城閣夏陰陰窈窕儒宮雙檜林六月沙郊騎馬到
四時潭水聽龍吟青氈況屬斯文地朱瑟還聞大雅音
亦是洛陽年少士白頭今日始冠簪

鰾魚

五月鰾魚已至燕荔枝盧橘未應先賜鮮偏及中璫第
薦熟誰開寢廟筵白日風塵馳驛騎炎天水雪護江船
銀鱗細骨堪憐汝玉筯金盤敢望傳

大復集卷二十六

欽定四庫全書會要卷一萬六千九百八十四

集部

大復集卷二十七

明 何景明 撰

七言律詩五十七首

雨過何太僕

簷日陰陰喧晚雷
坐深庭樹不思回
振風鶴鶴城邊去
截雨虹蜺海上來
詩興西堂還舊草
酒杯東閣又官梅
陰符遁甲談兵罷
愁向烟塵兩鬢催

為隴州李舉人壽其伯尚書公

見說尚書解綬還七年高卧隴西山曾懸履舄星辰上
更閃旌旗楚蜀間老伴青松全晚節靜餐丹藥駐春顏
竹林仲子追隨地二阮風流尚可攀

答劉子緯雨後之作次韻

萬里秋風張翰魚扁舟常憶楚江漁窮愁阮籍猶耽酒
老病虞卿只著書風晝海蒸雲自起水天沙霽日微舒
劉郎數月稀相見喜送新詩慰索居

天壇雷道士院

帝宮高鎖漢郊畿羽士琴書靜可依
蘿洞晝棲雲霧入石壇秋禮珮環歸
叢叢晚竹臨風整嘒嘒玄蟬曳日微
渡海却思千載事買山今恨十年違

送王御史德輝西巡

中朝御史重西巡獨下青霄斧鉞新
隴雪洮雲行塞日胡琴羗管奏邊春
蒲桃不博涼州地天馬還隨漢使臣
白筆萬人看氣象肯令河外有烟塵

送衛進士推武昌

少年佐郡楚城居十郡風流盡不如此去且隨彭蠡鴈
何須不食武昌魚仙人樓閣春雲裏賈客帆檣晚照餘
大別山前江漢水畫簾終日對清虛

送顧隱君還常州君來視其姪中書子進士

北庭綵袖日邊聞南甸青山海上分阮氏竹林推叔父
謝家寶樹有郎君河闕曉發隨燕鴈江路秋帆拂楚雲
歸向惠泉攜舊客菊筵開酒送清芬

十六夜尹舍人宅次劉汝忠韻

今年月色倍常年
今夕還如昨夕圓
江上鼉鼉皆有窟
塞南鴻鴈不同天
坐遲宿霧開風館
酒罷餘輝散燭筵
忽聽玉簫傳鳳曲
瓊樓高處綵雲偏

九日獨酌簡何太僕

無客秋堂菊自芳
寒城獨酌對重陽
愁來轉覺登臺懶
病裏誰傳落帽狂
海內弟兄非異姓
楚南賓客本同鄉
十年躍馬從君地
風雨看花意不忘

冬至

小至燕關眺望深吐雲山谷氣陰陰異鄉酸酒誰相醉
獨客篇詩祇自吟入面風霜增老色向人梅柳動春心
江湖更發南尋興極目茅堂楚岸林

送杭大參之河南

十年京國重才雄汝鄧山川喜借公杜甫交遊傾海內
謝家兄弟擅江東褰帷正屬瘡痍日開府元當控扼中
冬暮遙看南去節楚天春望北來鴻

同馮光祿登慈仁寺閣

今度慈仁寺閣遊
翠烟冬日抱重樓
冥冥繡拱盤空界
裊裊丹梯接帝州
立傍星辰天北極
坐看雲霧海東流
也知光祿高情興
自合題詩在上頭

哭以道

淚墮平生邂逅吟
想堪垂死更傷心
天涯見面愁雖減
海上傳書病已深
萬里艱難歸葬日
百年哀怨絕絃音
他時若挂留徐劍
忍向橋山覓墓林

送以正歸其兄櫬還關中二首

賢兄客死在燕山，令弟將歸陝路難。
哭向北雲扶旅櫬，望窮西日見鄉關。
原鴿雪羽飛偏急，屋樹春花發自斑。
岐路斷腸生死別，暮天回首淚潺湲。

二

君家昆季總能文，哭友那堪更送君。
嗚咽黃河流渭水，迢遙白雪度秦雲。
卽看斷鴈離羣去，况屬連枝落葉分。
少弟長安終日望，西來消息早相聞。

二月見梅

二月寒梅開滿枝
素心寧與艷陽期
攀桃映李千花妬
弄日含風一樹垂
不向天涯傷歲暮
豈緣江北見春遲
巡簷一笑聊相慰
鬪色爭妍非爾時

送蔣子雲冬官病還揚州

卧病長安不出門
話歸南國暫留尊
春來日日風塵色
海畔冥冥天地昏
坐傍桃花停岸舸
行隨楊柳到江村
楚山亦有蘼蕪草
遊子空傷萬里魂

九日同張膳部劉符臺遊法藏寺

東林地僻無人到
九日天清有伴尋
在野興深增感慨
望鄉心遠慰登臨
叢篁雨颯春牆碧
老檜霜留古殿陰
共酌昏鐘驅馬出
獨聆風鶴送餘音

詩上郭价夫內翰兄聊寫隕珠之痛兼致夢蘭之望云

四十生兒身未老
萬行哭子淚難收
乍看入掌明珠動
不見凌雲玉樹留
門下公侯應有種
堂中賓客尚回頭

蕙蘭若報三春夢消息先寬二老憂

對雪

九衢飄雪亂人行獨坐開堂烟霰生曲檻回廊輕駐景
裊雲停日重合情風前花絮疑三月天外樓臺望五城
出塞燕歌翻自苦入筵春曲向誰成

閣直立春日雪

天門望雪瞻華蓋御苑迎春試碧桃
牕色向明通散帙
鑪煙當晝引揮毫
雲連埤垧銀城迥
風繞呆愚玉殿高

綵仗數移西闕宴金花虛映北宮袍

送崑山王令還

九霄懸舄朝天至萬里揚帆上斗回
海甸風流無陸謝漢京詞賦有鄒枚
青鳬野送高旌駐綵鷁江行疊鼓催
悵別忍看燕草色寄詩須折早春梅

懷寄邊子

汝從元歲侍今皇誰念先朝老奉常
一出雲霄空悵望十年岐路各蒼茫
春天縹緲金莖露晝日氤氲紫殿香

獨有揚雄尚陪從白頭抽筆賦長楊

題嚴內翰賜扇

端陽綵扇百官傳每歲宮臣賜獨偏君去翰林供奉久
始來經幄拜恩年頒從殿閣風先動捧向雲宵月並懸
象轂銀環倍光寵好揚薰吹助虞絃

寄題鄭園

三山今有鄭公園避俗從來亦避喧蘿竹青青垂谷口
花林靄靄覆桃源天邊鴻鴈春寥廓海畔蛟龍晝曲蟠

南斗尺書招隱意白雲叢桂幾攀翻

立春日

楚客年華悲塞國燕京春色念江潭
香迎苑雪梅先放翠入宮烟柳乍含行
在旌旗猶駐北朝正冠冕自通南
青山起策青藜杖白髮羞看白玉簪

送陸舍人使吳下

柳拂清江畫鷁飛節旄更喜便南歸
迴風樹裏吹

一作催

官騎返照河邊上客衣北固樓臺秋寺遍
長洲花草故

宮非登臨莫怪多詞賦吳下才人是陸機

送徐舍人使南都

御書親奉出金扉草綠南徐四牡駢江上登臨鄉思遠
客中離別宦情微潮生鐵甕迷前代雲起金陵識舊畿
悵望一春詩社冷有誰吟對省中薇

送秦豫齋南歸領教安仁

兩年京國喜同遊忍送孤帆下潞洲世事悠悠鴈南去
客懷渺渺水東流雲間樹色通吳會月下潮聲過石頭

聞到錦江三畝宅開門遙對萬峰秋

送李長蘆先生

十年相見倍相親風表依然道義存
幾憶趨庭陪鯉對無緣縮地拜龍門
停杯慷慨論前事無劍跼蹐感舊恩
一別重逢更何處鴈聲東下海雲昏

送徐主事還金陵

送客出門三月暮片帆遙見石頭城
南方山水登仙興北望星辰戀主情
花暗河津天雨細月殘江館夜潮平

鳳凰臺上重回首六代繁華野草生

送夏少參之蜀

岷峨東下江水流劍閣西來烟霧收黃牛峽隘幾人到
金馬臺荒何處求父老三巴應渴望丈夫萬里是奇遊
錦官城外經行處古柏祠前拜武侯

至日過徐德章

竹門寒旭鳳城隈春氣潛浮地底灰世路十年長不定
客懷此日更難開天邊梅柳垂垂發歲暮陰陽冉冉催

見說吳江酒船到即拚留飲夜深回

陸子樓夜集

客來繫馬樓前樹暮倚危闌對雪峰人世百年還易過
天涯此會亦難逢浮烟近接千家市落日遙聞萬井鐘
殘歲良宵俱可惜紅塵分手莫匆匆

望雪

中原日見黃塵生上國空懸白雪情當畫風雲垂忽散
久晴江海凍難成農人隔歲猶須慮冠賊今冬尚未平

安得時和人更樂普天無盜勸春耕

送周令之蒙城

少年學道天下無白首談兵氣尚麤
郎位星辰瞻百里縣城山水接中都
留侯黃石橋邊履葛令丹砂海上爐
暫向風塵淹老驥擬看雲影候仙鳧

函谷草堂贈許廷綸

萬里河山一草萊百年松檜此堂開
晴瞻華岳青天上畫望仙人紫氣來
避世且耕歸馬地乘時須起卧龍才

長安送別風塵暮落日嵩雲首重回

寄康子

十年朋輩飄零盡海內兵戈戰鬪餘
花劇秦川誰見汝鴈稀燕北渺愁予
碧山擬著潛夫論丹壁應藏太史書
自笑此身今更出風塵空望白雲居

壽羅山胡侍御

直道清風天下重壽年况復古來稀
江邊舟楫非忘世海內干戈早拂衣
白石靈芝春自長秋山黃鶴健高飛

更喜繡衣經故里遙看綵服拜重闈

和王司封

仙省新詩幾度傳一吟鄉思一凄然許身自比南金重
浪跡聊為曲木全燕地湖山春酒畔楚天風雨夜燈前
看雲聽鳥同今日躍馬登龍憶往年

送李公從地官

鄉路春行傍九河帝京晴望五雲多城邊金鼓花時發
海畔樓船日夕過樹映仙郎添寵色草迎遊子助悲歌

同朝更待青霄節並馬能忘白玉珂

用韻答以行

無客琴書晝掩堂有詩先夢謝家郎
雨來碧草遙添色風過紅蕖不斷香
多病更逢愁是敵此身那得醉為鄉
巷南巷北稀相見偏側歌殘送夕光

石磯

石磯無伴滿蒼苔秋杜春蘭晚自開
江日烟波雙鳥去楚天風雨一舟來
釣鰲獨有滄溟興夢鶴誰知赤壁才

芳草歸人不愁思水雲山郭見章臺

元夕以道宅同蘇管二君子

烟滿春城夜色凝露融金掌月初升愁邊鼓吹頻催宴
望裏樓臺盡放燈四海朋簪今有盡十年岐路已無憑
相知更遇秦中俊欲贈瓊琚恨未能

輓范君山和其絕筆詩

老去詩篇興未休吏情終日問滄洲寒江夢落烟波斷
南嶽魂來霧嶂收一別人間真異世十年天上可同遊

魚龍寂寞瀟湘冷誰采蘋花薦晚秋

雲卿見訪次韻

悠悠世路誰知己莽莽乾坤獨愛才
近接南州留下榻久開西閣待傳杯
雪霜暮向天邊盡鴻鴈春從海上來
細柳明沙相送地不妨騎馬夜深迴

封君許太史公壽章

仙人親捧紫瑤編鳳鳥雙盤赤錦箋
天上封章傳翰苑山中壽酒屬春筵
星辰影動台垣裏林壑先生海岳前

回問郎君碧霄路石麟金馬玉堂懸

過寺訪以行

今年春色倍堪思
奈爾看春病起遲
牕矚太行雲斷處
坐聞江漢鴈來時
柳香漸撲燕姬酒
草色頻催謝客詩
更欲息栖尋野寺
細蘿芳杜碧山期

送戴進士時亮

戴生長嘯出燕州
知爾尋仙不可留
相望有時攀玉樹
此行何地覓丹丘
乘風逝鼓洪濤柁
觀日迴登滄海樓

白晝果然生羽翼青雲奚羨帝鄉遊

登樓觀閣時王令明叔邀張用昭段德光王敬夫

康德涵四子同遊二首

以下秦集

百丈丹梯俯翠岑千年壇殿肅陰陰風吹陸海黃塵暗
雲去函關紫氣沉春花況屬絃歌邑勝地還成翰墨林
香山洛社俱寥落文采流傳直到今

二

峻閣含風落照孤憑高千里視平蕪鳳笙錦曲春縹緲

瑤草金光晝有無採藥幾時尋碧海種桃無復問玄都
五陵冠劍豪遊地猶是長安舊酒徒

輞川

飛泉萬壑通藍水仄徑千峰入輞川野老豈知旌節到
世人空作畫圖傳鼃鼃岸圻深無地鷄犬林開忽有天
即此買山堪避俗桃源何必訪神仙

深一作疑

華州作東桑汝公

秋城雨色靜微塵過陝山河望轉新天上岳蓮開二華

雲中闕樹引三秦追遊少小還今日浪跡乾坤任此身
乘興欲攀仙掌去未知登覽共何人

東林書院

東林精舍接東城出谷先歌伐木聲氣象久瞻程伯子
振趨今見魯諸生芝蘭入室香俱化桃李開門樹總成
河渭滔滔同向海濟川舟楫幾時行

劉士奇張時濟過觀雪竹

裊裊朱絃留上客冷冷修竹對高軒重簷舞雪銀花綴

曲檻回風翠葉翻
湘浦珮環臨渭浦
秦園詞賦擬梁園
從今開徑延三益
聊共傾壺散鬱煩

送胡承之北上

秦關迢遞南山曲
漢閣嶙峋北極長
揚策恥誇終孺子
上書不學老馮唐
斗邊銀漢仙槎影
天上春雲畫省香
此去中朝才子列
定知詞賦有輝光

送盛斯徵巡撫四川

向來才籍九重知
此去勲名萬里馳
玉壘霜威侵斧鉞

錦城花色駐旌旗征南諸葛籌先定化蜀文翁事更宜
巴水泰山元自接好音莫遣北來遲

七言排律二首

平夷所老人

使集

平夷老人髮兩肩哀哀淚落古城烟歲收斗粟輸田賦
日向諸鄰乞米錢風雨飢寒趨路側子孫流落避兵年
青春有伴難還土白首無家尚戍邊官裏征徭何日已
軍中苦樂古來偏魂驚戰鼓心猶怯臂中飛弧肉盡穿

獨去負戈巡夜砦誰來銷甲種春田朝廷德意思柔遠
閭幄謨猷在識先夷狄本為王者外卒徒能受帥師憐
敢愁溝壑填哀謝只擬封疆息穢羶我願麾前法唐將
籌邊有策到今傳

寄李郎中

家集

星辰畫省鳳凰池同接金門白玉墀庭樹晝閒褰碧幕
苑花春好並金羈西京車馬誰言樂東漢衣冠忽已悲
萬里艱難歸故土兩鄉迢遞限雲逵青冥垂翅人皆惜

白日批鱗世所知天上神仙元有謫古來賢聖本多危
陸機入洛名逾盛司馬遊梁賦益奇海內競傳高士傳
朝廷誰訴黨人碑齊堂雷震冤臣出魏闕天高獄吏欺
千古死灰安國淚萬年災異廣川辭虞羅亦放冥飛鳥
卜獵何煩後載羆得失竟須知塞馬榮華終不易塗龜
嗟予蹇拙慙君匹念汝風流實我師索處自應思故舊
生涯今已笑支離遨遊昔忝登龍會驚下深懷附驥思
貢禹王陽同出處鍾期伯子是交期河陽雲樹情俱苦

渭曲烟花願豈遲回首西山多寇盜扁舟南國有旌旗
腐儒潦倒愁溝壑遊子飄零枉歲時路阻時危難會面
不禁涕淚望君垂

大復集卷二十七

欽定四庫全書薈要卷一萬六千九百八十五

集部

大復集卷二十八

明 何景明 撰

五言絕句七十首

兵書峽

使集

空巖一卷書綠苔字應滅志決功不成千秋有餘烈

絡緯吟

以下家集

絡緯催寒女悲吟入總幃秋風啼不斷相伴下鳴機

雨後十首

水漲孤村白天垂四野青開門秋雨霽閒步郭西亭

二

竟夕雨連舍今朝雲出溪輕雷千嶂外斜日數家西

三

三日不出門草長門前路登樓一水明倚柱千山暮

四

人歸郭門樹鳥噪野田風雨散高城上日落深澗中

五

畫角城隈起風吹響入雲清秋易生感深夜更多聞

六

遙看三角山正在雲生處日暮山中人空攀荔枝樹

七

片片白鷗鳥看人隊隊飛沙頭莫相認與爾久忘機

八

檻倚崩沙出籬通亂水過家人休掃石自愛碧桃多

九

朝聞城西鐘暮望城西寺寺傍二古松長藤垂到地

十

塘邊楊柳樹春條秋未摧已送黃鸝去還看白鷺來

八哥

窓前八哥鳥學語太輕狂何須似鸚鵡自遣羽毛傷

獨坐

獨坐鳴蟲起秋懷已不勝西風牕下度木葉洒寒燈

獨立

獨立對秋陰
冥冥望河渚
只見沙上烟
不見烟中雨

風雨

西郊秋日暮
雨細更風斜
應為重陽近
來催菊著花

長安

白雲望不盡
高樓空倚欄
中宵鴻雁過
來處是長安

簡趙雪舟乞菊二首

聞道君家菊
黃花爛漫開
若能移贈我
端勝白衣來

二

我有白玉酒君有黃金花相看九日到分送野人家

九月桃梨花

九月桃梨樹花開滿故枝寄言車馬客不是艷陽時

寄劉東之憲副二首

百里山河外孤城雨雪中遷鶯猶未起應是待春風

二

長安經歲別日日望春歸不及隨陽鳥雙雙又北飛

寄孫世其四首

騷衷如龍馬長鳴碧草萋莫將千里志暫悔蹶霜蹄

二

對書當為讀對食當為飽平生無限事努力在遠道

三

戴生北上日吾吟寶劍篇相過若相見高詠亦堪傳

四

旅食京華暮那能不憶家封書何日至塞鴈一行斜

白雪曲十首

美人朝玩雪置酒臨高臺祇疑仲春月風送落花來

二

舞雪流中堂揮袖拂不去細看簷外花半著庭中樹

三

暗逐梁塵起潛隨燭影流似憐歌舞處故入高樓

四

弱雪不到地宛轉高雲裡時有飛花落風迴更吹起

五

梅花開雪中相看鬪奇絕
常教雪似花莫遣花成雪

六

裊裊宵城烟皚皚積暮天
六花呈此日三白兆新年

七

艷曲燈前囀輕盃掌上揮
開簾炫積素當戶挹流輝

八

駿馬黃金鑣胡鷹赤錦絛
風搏千里翮雪點五花毛

九

公子孤白裘馳馬城東陌不見馬行影但見雪花白

十

簾幃照明雪美人起常早行看玉階上一夜長瑤草

出寺

春遊翠微裏晚下白蓮臺立馬遙回首青山暮雨來

璽上人送茶

鬱鬱雲中秀山僧採相饋我有毒熱腸此是清涼味

雨雪歌

千巖雲電烈萬室風霆翻
中宵雨撼壁平明雪滿山

小景四首

樓閣倚江濱桃花照暮春
安知看花者不是武陵人

二

草閣散晴烟柴門竹樹邊
門前有江水常過打魚船

三

照日楓林赤含風菊蕊黃
家家白酒熟何處過重陽

四

遠岸凍雲落高林寒日斜前村昨夜雪聞說有梅花

寄李獻吉二首

君作梁園客予登楚水臺春風河上柳不寄一枝來

二

渭水天邊樹黃河日暮流春來千里外知爾故鄉愁

題畫

翠壁層層合高松颯颯寒白雲晝不掃常滿石闌干

空屋見桃花

山桃空屋裡轉徙未還家獨有春風到猶開滿院花

聞蟬

二月寒蟬至哀鳴亂葉中林花滿眼發蕭颯似秋風

登樓

獨坐高樓上看花淚暗流東風無限好日暮使人愁

邀劉文直不至

劉郎招不至嗜酒世間稀爾是劉伶後何妨荷鍾歸

席上分得時字送豫齋二首

以下京集

澤國登樓處江船見月時
回書寄來使多是客中詩

二

花影晚離離迢遙動遠思
清宵不成寐山雨到牕時

雙梧草堂二首

君愛堂前樹嵯峨碧幹雙
相思秋月下桐子落雲牕

二

記得別草堂采采桐始華
銀床飄一葉秋到美人家

扇面小景

山色碧於苔
晴牕日日開
遙知抱琴者
應為看山來

題畫二首

縹緲春山雲
離離春江樹
君看江上山
不是人間世

二

古洞入青冥
山通武陵渡
漁郎莫放舟
恐失花間路

飲鮑以忠

萬戶夾垂楊
君家大道傍
相逢一尊酒
何惜醉他鄉

謝泰公饋杏

饋我高林杏開函爛如火安得祇樹園從公問真果

送泰公茶

英英白雲華采采六山秀為問病維摩此味清涼否

晚出左掖簡薛君采二首

玉河迴宛轉丹闕對嶙峋出入雲霄上蹉跎江海身

二

露重芙蓉館雲輕翡翠城文園病司馬消渴望金莖

清明二首

城南好花樹不作看花行
恰好人來日春風不放晴

二

何限新桃李春來樹樹花
不爭風雨惡無奈委泥沙

秋日簡川甫

紅葉翻霜畫青苔積暮天
若無桓子過誰問子雲玄

答施生二首

二泉門下士海內早知名
通家一書札萬里各含情

二

日射江門動龍蟠海霧生排空有羽翼不上九天行

至日答良伯

天邊登北樓歲暮望南國江梅與塞柳莫問春消息

十六夜賞月野塘宅

今夕非昨夕清光依舊多後庭開月燕窈窕轉春歌

鳳縣秦集

畢郢藏龍地南岐集鳳岡嘉陵江水色萬古向西康

六言律詩二首

上元葉邦重別墅歸

家集

昏鐘野寺到郭晚飯人家出村斜日山巔水曲東風萬
戶千門星河渡口深夜燈火城中上元猶似去年今夕
不堪烟景銷魂

盤屋清明日

秦集

客裏遙逢令節城中不見繁華南山漠漠烟遠清渭迢
迢日斜獨樹桃花自發高樓燕子誰家可惜年年春色

催人白髮天涯

六言絕句六首

贈賈司教先生

以下家集

春風桃李絳帳朝日
首宿空盤王公不志
溫飽鄭老豈為飢寒

一賤一貴世態有憂有樂
人情應鱣闕西夫子知魚
濠上先生

江南思四首寄曹毅之

以下京集

燈下雨鳴秋舫浦口潮迴暮鐘何處相思不見江南開
遍芙蓉

月冷荒祠苦竹秋清玉殿蒼苔一望雲帆無際沙明白
鳥飛來

細雨寒城催棹夕陽孤嶼鳴鐘到寺莫題蕉葉渡江為
採芙蓉

竹淨娟嬋帶月山寒杳窅沉暉天邊晚樹獨眺江上春
潮客歸

七言絕句四十八首

玉庵 為黔國賦 以下使集

虛閣清風竟日留
白雲暗對小牕幽
我題名字琅玕上
珍重霜標奈得秋

遊黔國魚池四首

小岸城邊上輕舸
一溪宛轉向魚池
水藤濛濛荷葉暗
棹入中流總不知

池邊二十五亭臺
箇箇朱牕向水開
亭下扁舟蕩雙槳

打魚送酒幾回來

半竿斜日踈蒲明兩岸人語鳬不驚菱葉拂衣香袖舉
秋風吹浪綠舟輕

三陣五陣打荷雨一點兩點照水螢笙歌留客不知夜
燈火迴舟直到城

夷陵

夷陵城邊江水渾無數輕帆落遠津萬水雲中三峽路
猿聲愁殺渡江人

溪上水新至漫興四首

以下家集

溪上水生三尺深茅屋清夏氣蕭森無錢即買扁舟至
繫向門前柳樹陰

雙飛鸕鶿戀青莎對舞蜻蜓愛碧波一夕水風開菡萏
畫船齊唱採蓮歌

菡萏風前花不稀菖蒲雨後葉初肥黃鸝白鷺知人意
來往鷓鴣洲上飛

碧沙青泥俱可憐白鯁赤鯉不論錢莫嘆鄰翁生計拙

買船沽酒過年年

秋日雜興十五首

寒螿啼斷槿園空
萬樹凋傷八月中
只有南山蒼桂在
一株花發向秋風

雨花風葉總堪憐
海燕江鴻各渺然
莫向高樓空悵望
暮蟬多在夕陽邊

野亭千橘未全黃
青柿紅梨俱待霜
南隣老翁種橡栗
已見兒童收滿床

紫蔓青藤各一叢野人籬落管西風郊扉遠絕誰能到
秋日蟲鳴豆葉中

道上高墳古鬱林夕園空鎖碧藤陰人言啼鳥多情思
却為誰家作好音

急杵繁砧一郡秋西風落月萬家樓不知塞下征人怨
但見閨中少婦愁

八月飄零九月來天時人事太相催千紅萬紫都看過
只有黃花與白梅

荻岸秋清似畫圖
風高沙鴈起相呼
何如莫去瀟湘上
借爾烟波畫引雛

釣臺臺下澗水清
釣臺臺上秋草生
當年誰是持綸者
賢隱山高萬古情

溪上茅齋楓樹林
渚雲沙日共陰陰
連朝不遣家僮掃
紅葉蒼苔一尺深

栢林楓岸迥宜看
楊柳芙蓉不耐寒
最愛高樓好明月
莫教長笛倚欄干

斜日村原秋水多
家家門巷好經過
繁絃急管休相聒
田父山妻自解歌

蒼鳬攜子戲波瀾
懶惰輕鷗不下灘
白鷺照影秋塘裏
似爾心情亦太安

鱗鱗鯉魚三尺身
纖鱗照水白如銀
未須更論成龍勢
只在溪中亦有神

竹靜沙寒野日低
門前秋草不成蹊
山禽汝亦何多事
未向棠梨樹上啼

雞鳴曲三首

雞鳴城中滿樹霜
青樓旭日照流黃
鳴箏錦瑟秋塵裊
玉鴈金蟬共一行

青樓遙臨大道衢
美人雞鳴著繡襦
誰家公子過樓下
那不繫爾千金駒

樓上羅幃映早霞
不須重鬪鏡中華
春蘭秋菊皆零落
爭似菖蒲不作花

喜戴仲鵠得鄉薦二首

梁園宋苑却宜秋
夾道槐花照綺樓
試問東瀛海邊住
何如金明池上遊

馬上秋風得意歸
大夫豈是愛輕肥
傍人休訝新年少
曾向長安作布衣

慰任宏器諸友失第二首

莫將遲暮怨飛蓬
萬事還須問塞翁
黃鵠但教毛羽在
不妨失意下秋風

青雲白髮太難平
去鴈來鴻亦世情
我亦少時曾得意

十年回首是浮名

黑龍潭

白雨遙從白日來
黑雲低映黑龍臺
空思玉鯉臨淵嘆
未掣金鰲跨海回

過先墓

愁摧斷柳柳還稀
淚灑殘花花更飛
一寸未忘遊子線
萬年難覓老萊衣

野屋

野屋雙飛燕子低
短簷千尺柳條齊
桃花片片紅臨水
小麥纖纖青映泥

對菊四首

三閭大夫不願醉
五柳先生不願醒
一醒一醉緣何事
坐對寒花烟滿庭

菊過重陽開更繁
城中車馬未曾看
種來本是山家物
白露青霜共暮寒

檻畔輝輝纖月斜
幽香獨立殿年華
多情似與詩人約

一夜還開四五花

露委烟斜更有情
黃花紫萼太分明
只教秋色常為主
莫遣西風怨落英

葡萄二首

晴闌裊裊風鬚動
暑架垂垂露乳寒
却憶高樓清夏日
美人常對水晶盤

漢家葡萄出西域
斗酒曾博梁州戍
當日誰知使者勞
至今人種葡萄樹

簡賈司教二首

郭西茅屋帶峰巒竹徑花闌亦可看
騎馬自來還自去無人知是廣文官

古壇雙樹挺秋烟廢院殘花照暮天
門外掃除無俗客我來時復伴青氊

吾郡古要害地也閒居興懷追詠古跡作詩八首
西來一道是淮源南向千峰盡楚山
風雲尚擁蛟龍窟天地曾開虎豹關

寂寂孤城申伯臺
廢園遺沼盡堪哀
繁華惟見東流去
歌舞空傳此地來

南山西嶺自天來
翠壁丹崖映日開
不見當時卧龍者
只今惟有釣魚臺

仙人昔返上清家
留下仙壇號紫霞
世人不識蓬萊樹
道士空餐松栢花

郡西山畔舊禪宮
朝暮風烟多不同
已見樓臺翠微裏
更聞鐘鼓白雲中

震雷山頭石潭水
夜夜蛟龍行雨歸
青春下與滄溟會
白日常聞霹靂飛

楚關申戍鬱茫茫
野草春沙更斷腸
山頭僧住何年砦
人耕古戰場

城邊溪流郢中風
物更堪愁行人欲
問陽春曲
此地猶傳白雪樓

大復集卷二十八



總校官庶吉士臣侍朝

校對官編修臣馬啟泰

謄錄監生臣沈智

欽定四庫全書薈要

集部

大復集卷

二十九
三十

詳校官侯補通政司經歷臣郭祚熾



欽定四庫全書薈要卷一萬六千九百八十六

集部

大復集卷二十九

明 何景明 撰

言絕句九十七首

別相餞諸友

雙井山邊送客時
滿林風雪倍相思
西行萬里遙回首
太華終南落日遲

友人夜宿

相逢猶憶十年前
青草書堂溪水邊
四海交遊今殆半
幾人風雨對牀眠

題馮大京畫蘭

雨葉風花獨奈寒
圍春不借曲闌干
國香空谷無人見
映玉輝金畫裏看

適堅山寺

誰謂高僧不可逢
出城西望有雲松
騎驢不畏青泥坂
拄杖遙尋碧玉峯

雨中看花七首

溪上雨色晚來頻
枝頭花朵太禁春
滿林爛漫誰覺汝
一樹分明獨惱人

連朝風急雨滂沱
樹頭葉暗花不多
縱使明朝風雨息
蒼苔狼藉奈愁何

昨朝日照花盡開
今朝雨多花可哀
由來落花無根蒂
隨風吹去又吹來

正月已放山丹花
二月桃杏似雲霞
城中少年紫騮馬

日暮來尋碧玉家

郭外春風次第來
杏花開後桃花開
近城早花開已謝
狂風猛雨更相催

紅花紫藥千萬枝
日夜雨打更風吹
牡丹芍藥莫太驟
暖日晴烟開不遲

牡丹雖遲是花王
芍藥留之殿春光
好花元待後時發
穠李妖桃空自狂

賈西谷邀飲山寺朝信不至詩以促之

廣文邀客寺亭幽此是春山第二遊立馬望君君不到
不知城市為誰留

任洪器草亭四首

蔀簷當午溪雲度花重寒枝閣曉庭芳草閉門春寂寂
東風吹雨半池青

薔薇深院無行跡風到閒門掃綠苔明月滿庭香襲襲
野塘新水藕花開

繞屋南山秋色靜數枝寒菊一籬烟酒醒讀罷秋聲賦

風落松梢響石泉

門外水流雲自起
雪峰半出草堂西
孤舟欲作山陰夢
月冷梅寒共一溪

岳豫之小畫四首

溪上水生茅屋涼
溪邊風急樹顛狂
山中車馬何曾到
祇有雲松盡日蒼

碧江樓閣夕陽邊
萬壑千峰生暮烟
江上長松一千尺
月明常繫打魚船

百尺孤城對碧山層層樓觀倚雲閒水明沙白風濤靜
更有何人到此關

樹下茅齋當畫清江邊寺閣倚新晴蒼苔石徑無人到
獨有幽人江上行

元夕懷都下之遊五首

憶昨長安元夕來五侯絃管上樓臺已見炬如千樹列
更看燈似百花開

龍岫層城接御溝香車寶勒夜深遊花坊競買千金帶

綺陌皆懸五色毬

夾路香塵夜不開
萬人爭道看燈來
金波宛轉千門裏
銀漢逶迤一道迴

紫禁煙花一萬層
鰲山雲裏見峻嶒
繁星散作宮中炬
明月來為殿上燈

白馬金珂上苑東
六街歌舞散香風
豪遊已作三年夢
愁對春燈此夜紅

題潘秀才吹笛畫扇

幽人橫吹滄江靜滿江月白青山映好作穿雲裂石聲
夜長恐有蛟龍聽

寄岳陽龐推官四首

君因謫宦留南郡予亦罷官歸故鄉同是鳳凰池上客
江湖千里轉堪傷

洞庭湖邊花柳新岳陽樓上更逢春閒來載酒題詩去

還似當時賈舍人

唐賈至
謫巴陵

三載江城佐郡郎十年天上舊鵷行曾持畫省郎官筆

況著瑤池近侍裳

湖水春來不見沙
九疑南望是天涯
軒轅臺上清風樹
湘女祠邊日暮花

閨情

以下京集

秋風嫋嫋生羅衣
美人夜泣紅燭微
郎騎白馬臨邛去
樓上年年燕子歸

晚至昌平寺中

度盡青溪十里霜
寒蕪落日下蒼茫
山城薄酒無錢買

晚飯僧家石耳香

雪中漫興

長安雪花亂如雲
複道層城望不分
行客遙傳五侯宅
畫樓絲管畫紛紛

寫情

莫將錦瑟怨年華
柳絮飄零夢謝家
小院迴廊鎖春晝
何人來為掃庭花

送鄉人還

楊柳花飛蕪草青故鄉南望幾長亭城邊客散重回首
愁見孤鴻落晚汀

聞歌

明月暫隨秦弄玉碧空遙度楚行雲莫言此曲終堪聽
孔雀東南各自分

諸將入朝歌十二首

北掃燕齊南楚吳風吹殺氣散輿圖蓬萊山下朝諸將
天子戎衣受獻俘

大將龍旗朝帝京至尊親遣貴臣迎侍中獨領嫖姚部
戰馬皆歸龍虎營

羣公陪宴柏梁臺殿上傳呼萬壽杯元戎節鉞來江上
使者樓船泛海迴

河濟江淮血不流中原萬馬一時收黃金未散成功士
白纛先臬敗將頭

河北諸軍盡有名雲中驍騎本輕生金裝白馬翩翩出
不見長安子弟兵

玉佩金貂列上勲
槌牛殺馬犒三軍
萬里旌旗天上度
滿城金鼓日邊聞

天下山河首洛中
漢家州縣滿山東
將軍不畫麒麟像
士卒休論汗馬功

龍虎金陵擁帝居
吳闕水府控淮徐
樓船一鼓風波力
滄海鯨鯢作釜魚

闕下千官侍鳳樓
苑中天子建龍旂
豹房虎圈先班賞
武帳前邊賜姓侯

戰士歸來皆武冠紫纓駟馬跨金鞍可憐萬國城頭月
照見沙場白骨寒

少年生長在邊城介冑南征蟻蝨生馬上朝來橫吹曲
梅花一半是吳聲

杲杲扶桑朝日升東瞻碣石海波澄正德七年誅叛賊
大明八葉覩中興

樊駙馬府中宴

主家行酒雙玉杯上客不醉歌頻催秦女簫中明月度

鳳凰樓上彩雲迴

閣內杏花

東掖杏花開不遲
日邊春色獨先知
未薦玉盤千歲實

空看

一作蟠

仙閣五雲枝

孫太史宅贈呂揮使二首

壯士承恩天上還
黃雲白雪暗西山
破敵未傳青海曲
封侯須到玉門關

白馬駢弓出薊門
相逢意氣倒金尊
功勲要識將軍呂

文字先看太史孫

贈薛君采二首

五花似玉麒麟骨八尺如龍驤
裹身千金臺上求非易
萬馬羣中認未真

爾夢仙人海上行蓬萊清淺不勝情
金門再見東方朔
笑指蟠桃花更生

送韓汝慶還關中二首

六月西山雷雨低長安城中十日泥
君騎鴻鵠冥冥去

此地愁看燕雀棲

華岳雲臺萬里情
高秋落日眺秦城
黃河一線通滄海
身在仙人掌上行

燕京十六夜曲四首

御河橋畔千尺臺
燕京女兒踏歌來
臺上歌鐘日夕起
橋頭酒壚深夜開

萬歲山頭鎖玉樓
十王館中人不遊
中宵金鼓雲間動
翠輦龍衣過五侯

九衢車馬似山河萬金買燈不道多已留華月照歌舞
更放香風吹綺羅

月高罷遊關九關暗塵吹汚香霧鬟誰家少年亦太惡
拾着金鈿不肯還

苦熱行十首

六月十一日苦熱奪伏爭秋番太强燕京何限好樓閣
袒走狂呼無地涼

日午放朝車馬頻中天風火促飈輪侯宮戚館永山冷

赤日黃埃渴殺人

宮裏傳冰賜從官
含霜弄雪白雲寒
銀牀晝鎖瑠璃井
玉殿陰沉瑪瑙盤

午門朝罷午時過
千官萬馬汗成河
莫道宮中愛長晝
長晝宮中樂事多

西山松柏千丈臺
陰崖脚踏層冰開
巖樓洞閣生霜雪
觸熱衝炎誰為來

長安萬家懸甌裏
風捲塵沙當晝起
五侯堂上冰成山

朝見成山暮成水

城西山峻火雲峰丹梯無路躡芙蓉白石寺前堪避暑
昨朝雷拔殿壇松

赤地驕陽草不生河潭霹靂懶龍驚彎弓后羿非夸父
莫放青天十日行

晝夜蚊蠅飛滿天穿牕撲帳攪人眠乘炎趁熱雖吾畏
露打霜飄不汝憐

胡馬炎天動萬羣昨傳遼水殺將軍王師六月殲獫狁

兵氣遙蒸瀚海雲

內閣荷花二首

誰送仙花此地栽
綵雲飛掌對蓬萊
雕闌玉檻圍花發
不放金盤十丈開

風吹菡萏並頭開
水照金魚隊隊回
映日跳波珠易碎
接雲步障錦成堆

送鞏丞之金壇因訊養和

鞏丞若問金壇宰
為見風流御史才
到日琴堂定無事

松廳竹檻對江開

雨望西山

碧山鳴雨過嵯峨湖水風增萬丈波
千尺浮圖清暑殿高牕白石細盤蘿

送王提舉

日出帆高烟水空嶺雲遙在粵天東
此行不為浮江興他日須傳煮海功

東岳亭

卜築東岳白石砭孤亭裊裊出烟江細分楊柳開風檻
倒影扶桑坐日牕

椒軒

春開軒地引紅椒錦樹西江望不遙當戶踈簾看結實
背岡茅屋憶行條

寄少谷山人二首

武夷九曲上仙庭錦疊青天萬仞屏下望神人釣鰲石
北風吹霧海冥冥

台嶽中峯綵霧生石梁遙挂赤霞城仙潭尺素傳雲鯉
報爾今尋華頂行

送陳進士還江西

廬山高起讀書臺萬卷少年今日開九派江流何處入
海風吹浪楚帆來

張子近得道士飲鹿血術欲試未得吾有一鹿欲
取血飲張子臨庖哀呼不忍見死乃作詩遺張
子馬

聞食玉脯飲丹血補腦還精身體輕刀几即看衰一死
道人那忍說長生

送甥朝良讀書梅黃山下

聞汝讀書山之中閉門千峰兼萬峰但知高鳳曾飄麥
不論丁生解夢松

宮詞四首

杳杳高城南苑陰苑中日夕翠華臨城邊獵騎分行逐
射得黃熊索賜金

碧草萋萋生御溝，垂楊嫋嫋夾朱樓。
牕臨北斗空中起，水接銀河天上流。

微霜淒淒金井欄，城頭月出凍雲殘。
玉樓高對蓬萊雪，誰道宮中夜不寒。

宮中夕寒花不開，金屋沉沉玉殿苔。
繞見高臺燈火下，更聞前路管絃催。

寶鷄縣

以下秦集

鷄鳴山下古陳倉，板屋千家清渭傍。
曲岸迢遙凌秀麥，

流渠宛轉入垂楊

漢中歌二首

漢王昔日定三秦壯士東歸意氣新
旌旗暗度陳倉口父老重迎灞水濱

燒棧登壇各有勲謀臣猛將鬱如雲
關中自識龍顏主海內爭看縞素軍

終南篇

離宮別館舊京華表裏關河屬漢家
二閣天圍青錦障

五臺雲湧石蓮花

四圖詩贈何燕泉四首

卧遊亭在古椿園萬里輶車出塞垣
天馬一從隨漢使星槎誰復到河源

職方奉使圖

河南河北望行塵露冕褰帷拜野人
嵩少風雲千里色軍懷花柳萬家春

藩省旬宣圖

當朝太僕世稱賢在垌常歌魯頌篇
天上驕驍惟一骨苑中駉牝實三千

大卿考牧圖

西城百年通貢篚中丞萬里建旌旄坐掃蠻山開瘴癘
永令滇海息波濤

都憲巡撫圖

元日

扶桑日射南山觀楊柳春回北斗城萬里冠裳遙望闕
九霄車駕喜還京

畫竹

誰開素練寫烟梢欲采琅玕奏玉簫猶憶鳳凰池閣上
坐聽風雨下層霄

米元章拜石圖

節比巖巖志比堅冠裳下拜也堪憐此意世人誰解識
至今空羨米家顛

大復集卷二十九